



Inatsisartunut ilaasortaq
Karl Lyberth
Siumut

Inatsisartut suleriaasianni § 37 naapertorlugu, tarnikkut innarluutillit katsorsarneqartarneranni kalaallisut oqaasilinnik sulisussanik ilinniartitsisarneq pillugu apeqquteqaammut nr. 2011-39-mut akissut

Inatsisartut suleriaasianni § 37 naapertorlugu Naalakkersuisunut, tarnikkut innarluutillit katsorsarneqartarneranni sulisussatut ilinniartunut kalaallisut oqaasilinnut ilinniartitsisarneq pillugu, arlalinnik apeqquteqaateqarsimavutit.

Apeqqutit tamarmik peqqissaanermik ilinniartitaanernut immikkullu piginnaanngorsarnermut tamarmik Peqqissaanermik Ilinniartimmi (PI) ilinniarneqarsinnaasunut tunngapput.

Matumuuna apeqquteqaatit tullerriaarneqarsimanerat naapertorlugu akissuteqarfigineqassapput.

- 1. Peqqinnissamut ikiortit (sundhedshjælper-it, sundhedsmedhjælper-it) tarnimikkut innarluutilinnut katsorsartariaqartunut sullissinissaminnut soqutigisaqartut misilitsittarneri suna imaluunniit suut pissutigalugit danskit oqaasii kisiisa atorlugit ingerlanneqartarpat?**

Akissut:

PI-mi ilinniartitaanerit marluusut assigiinngitsutigut tarnimikkut nappaateqartunik sullissisinnanarmi nalunngisassanik tunngasortaqaqput; tassaappullu peqqinnissamut ikiortit ilinniartitaaneq aamma sundhedsassistentit ilinniartitaaneq.

Peqqinnissamik ikiortit ilinniartitaanerat kommunini utoqqarnik sullissisinnanissamut siunniussaavoq. Ilinniartitaanermi, tarnikkut nappaateqarnermut tunngassuteqartut ilaatinneqarput. Ilinniartitaaneq soraarummeernermik naggaserneqartarpoq, soraarummeernerlu, allattarissatigut oqaluttarissatigullu, ilinniartup nammineq aalajangigaa naapertorlugu kalaallisut qallunaatulluunniit ingerlanneqarsinnaasarpoq.

PI-mi aamma sundhedsassistentit ilinniartinneqartarput. Ilinniartitaaneq tamanna napparsimmavinni sulisinnanissamik siunertaqarpoq. Ilinniartitaanermi atuagarsornikkut tarnikkut nappaatit sammineqartarput taamatullu tarnikkut nappaateqartunik sullissinermik sungiusarneq ingerlanneqarsinnaasarpoq. Sungiusarluni sulinerup taamaattup nalaani allattariarsornermi suliakkiisoqartarpoq allattariarsornikkullu suliaq taanna angusissutaasutut akuerineqartussaavoq. Allattariarsorluni suliaq taanna amerlanertigut qallunaatut allanneqartarpoq. Tamatumunnga peqquataatinneqarpoq ilinniartut amerlanerit qallunaatut oqaasilinnik sungiusarnermi siunnersorteqartarmata sungiusarnermilu siunnersortit allattariarsornermi suliamut nalilersuisussat ilagisarpaat. Taamaaliorneq soraarummeernerunngilaq suliaminnillu allanngortitsisinnanarnermut periarfissaqartarput taamatullu periarfissaqartinneqartarput sungiusarnerminnik sivitsuinissaminnut piginnaassuserilikkaminnut nalilerneqarnerminni angusassaminnik

25. feb 2011
Sagsnr. 2011-044291
Dok. Nr. 571736

Postboks 1029
3900 Nuuk
Tlf: +299 34 50 00
Fax: +299 32 20 73
Email: kiin@nanoq.gl
www.nanoq.gl

inorsassagalarunik. Taamaakkaluartooq sungiusarlutik suliaminni piginnaassuseriligassaminnullo piumasaqaataasunik naammassinnittariaqarput, assistentit ilinniakkaminnut naammassinninniarlutik soraarummeersinnaajumallutik.

Tamatuma kingorna sundhedsassistentit tarnimikkut nappaatilinnut sullissinissamut, qaammatinik tallimanik sivilissuseqartumik ilinniaqqinnikkut, immikkut piginnaanngorsarsinnaapput. Tarnimikkut nappaatilinnik sullissinissamut immikkut piginnaanngorsarneq atuagarsornertaqarlunilu sulinertaqarpoq. Atuagarsorluni atuartitsinertaa suliamik ilisimannittuusunit tarnimikkut napparsimasunut tunngasuni immikkut ilisimasalinnit isumagineqartarpoq sulinertaa Dronning Ingridip Napparsimmavissuani Danmarkimiluunniit tarnimikkut napparsimasunut immikkoortortami pisarluni. Atuagarsornertaa sulinertaalu atuartitsisunit danskisut oqaasilinnit – peqqissaasunit nakorsaniillu – isumagineqarnerusarpoq taamaattumillu danskisut pisinnaasaqarlunissaq piumasaqaataasarluni. Immikkut ilinniagaqarnermi inaarutaasumik misilitsinneq qallunaatut ingerlanneqartarpoq.

Ilinniartut sulisullu ilinniarsimasut Peqqinnissaqarfimmi suliassaqarfimmi sulisuusut nakorsap ass. sunik nakorsaasiineranik napparsimasullu suneqarnissaanik paasinnissinnaanissaat piumasaqaataavoq. Taamatuttaaq ilinniartooq ilinniarsimasorlu napparsimasup qanoq innera pillugu nakorsamut peqqissaasumulluunniit paasissutissanik ingerlatitseqqissinnaassapput. Tamatumani danskisut pisinnaasaqarnissaq piumasaqaataavoq.

2. Peqqinnissamut ikiortit tarnimikkut nappaatillit uninngaffianni (psykiatrisk afd.) sulerusullutik misilitsittuni qanoq amerlatigisut angusinngitsoortarpat?

Akissut:

Tarnimikkut nappaatilinnut sullissinissamut immikkut piginnaanngorsartut tamarmik soraarummeernerme piumasaqaatinik angusisimasuupput.

Peqqinnissamut ikiortit immikkut tarnikkut nappaateqartut pillugit soraarummeersinneqarneq ajorput, ilinniartitaanermili aqusaagassat ilagaat tarnikkut nappaateqarneq pillugu ilisimasassat soorlu puigortunngortarneq. Peqqinnissamut ikiortit nalinginnaasumik tarnikkut nappaatillit katsorsarneqartarfiini atorfinitsinneqarneq ajorput amerlanertigulli atorfinitsinneqartarput nakkutigineqartariaqartunut paaqqinniffinni imaluunniit kommunimi taamaattumik apeqqut erseqqissumik akiuminaappoq.

Peqqinnissamut ikiortit soraarummeertarnerat assersuutigalugu tarnimikkut nappaateqartut katsorsarneqartarfiini sulinissamut immikkut ilusilersugaanngilaq taamaattumik kisitsisilersoruminaappoq qassit immikkut taamatut suliaqarnissamut ajornartorsiuteqarnerut.

3. Angusinngitsoortartuni qassit qallunaatut amigartumik piginnaasaqarneq pissutigalugu angusinngitsoortarnerut misissorneqarnikuunerluni?

Akissut:

Ilinniartut tarnimikkut napparsimasunik sullissinissamut immikkut piginnaangorsarnermik aallartisisimasut soraarummeernerminnik naammassinnissimasarput.

Peqqinnissamut ikiortitut ilinniarnermi, oqaatsit sorliit atorlugit soraarummeerumanerluni, ilinniartup nammineq aalajangertarpaa.

Sundhedsassistentitut ilinniarnermi misissuisoqarsimangilaq PI-lli naatsorsuutigaa, ilinniartut soraarummeernerminni angusinngitsoortarnerat, suliassaq pillugu piginnaasakissuseqarnermik amerlanertigut peqquteqartartoq.

Naalackersuisut kikkulluunniit, ilitsoqqussaralugu oqaatsit apeqquataatinnagit, ilinniarnissamik neqeroorfigisinaanissaat angujumallugu suliniuteqarput. Pisariaqangilaq Ilinniartitsinerup ilitsoqqussaralugu oqaatsit atorlugit ingerlanneqarnissaa, ilinniartitsinermili tunngavigineqartuni periutsinilu atorneqartuni, ilinniartut oqaatsitigut kulturikkullu assigiinngissuseqarnerat, pingaartinneqartariaqarpoq.

Inussiarnersumik inuulluaqqusillunga

Mimi Karlsen